

Bases reguladoras da participación na I edición do Concurso de Fotografía en torno á celebración do Orgullo LGTBQI do Concello de A Coruña, “Vive o teu orgullo” 2017.
(Aprobadas por Resolución da concelleira de Igualdade e Diversidade de data 19/06/2017)

A Concellería de Igualdade e Diversidade do Concello da Coruña convoca a I edición do Concurso de Fotografía “Vive o teu orgullo”, como parte do conxunto de accións postas en marcha co obxectivo de reivindicar a igualdade das persoas LGTBQI, traballando pola súa visibilización e apoiando as súas reivindicacións. Con este obxectivo, este concurso busca trasladar ás redes sociais ese traballo pola visibilización da diversidade afectiva sexual, pola creación de referentes lonxe dos estereotipos en torno ás persoas LGTBQI, e pola presentación de corpos e expresións diversos. O concurso busca a implicación activa da veciñanza da cidade, fomentando a súa creatividade, como complemento a outras actividades cun carácter máis divulgativo ou formativo.

O concurso desenvolverase de acordo ás seguintes bases:

1.- QUEN PODE PARTICIPAR?

1.1. Poderán participar neste concurso todas as persoas maiores de 14 anos residentes no Concello da Coruña.

1.2. As persoas participantes no concurso deberán ser as únicas titulares dos dereitos de autor das fotografías presentadas e feitas legalmente.

1.3. A participación nesta convocatoria supón a aceptación das persoas participantes ás presentes bases e o compromiso de cumprimento das mesmas.

2.- CAL É A TEMÁTICA?

A temática do I Concurso de Fotografía “VIVE O TEU ORGULLO” 2017 é ampla. O convite lanzado dende a Concellería de Igualdade e Diversidade é que as fotografías presentadas teñan relación coas diferentes realidades e vivencias en torno ao Orgullo LGTBQI, á diversidade de corpos, identidades e expresións.

3.- QUE TIPO DE FOTOGRAFÍAS PODEN PRESENTARSE?

3.1. As fotografías deben ser tomadas pola persoa participante, orixinais e inéditas, serán presentadas a título individual, e non premiadas noutros concursos.

3.2. Cada participante poderá presentar, **como máximo**, 3 fotografías, pero soamente gañar un dos premios.

4.- COMO PARTICIPAR?

4.1 A participación neste concurso é gratuita e non é preciso ningún rexistro. O único a ter en conta é que as persoas participantes deberán ter un **perfil en Instagram coa configuración de privacidade en “Público”**, para que deste xeito as súas publicacións sexan visibles pola Concellería de Igualdade e Diversidade e as persoas que formarán parte do xurado.

NOTA: Instagram non patrocina, apoia ou administra de ningunha forma este concurso, nin está asociado ao mesmo.

4.2 O período de participación comezará coa publicación destas bases na páxina web da Concellería de Igualdade e Diversidade o martes 19 de xuño de 2017, e rematará o venres, día 9 de xullo de 2017, ás 23:59h. Calquera imaxe publicada antes ou despois destas datas non será considerada para a participación no concurso.

4.3. Para entrar no proceso de selección, as persoas que desexen participar deberán publicar as súas fotografías dende o seu perfil de Instagram, **incorporando o hashtag #viveoteuorgullo**.

4.4. As fotografías poderán ter correccións de cor ou flitros, pero non deberán estar manipuladas dixitalmente en termos de contido ou contexto.

4.5. Como se especificara no punto 2, o tema do concurso xira en torno ás diferentes realidades e vivencias no marco do Orgullo LGTBQI. Por tratarse dunha cuestión que promove valores de respecto e recoñecemento, e visibiliza realidades diversas, valorarase positivamente aquelas fotografías que se presenten acompañadas dun título ou unha breve explicación por parte da persoa participante.

4.6. A Concellería de Igualdade e Diversidade resérvase o dereito de excluír do proceso aquelas fotografías que entren en conflito cos valores promovidos por este concurso, e que conteñan contidos LGTBQIfóbicos, sexistas, racistas, ou que vulneren calquera outro dos dereitos fundamentais das persoas.

5. CALES SON OS PREMIOS?

Establécense os seguintes premios. De entre todas as fotografías presentadas, serán escollidas tres, que recibirán:

- Primeiro premio: Vale por un valor de 300€ a trocar en calquera das 14 librarías da cidade colaboradoras coa Programación LGTBQI das bibliotecas municipais, e un diploma.
- Segundo premio: Vale por un valor de 150€ a trocar en calquera das 14 librarías da cidade colaboradoras coa Programación LGTBQI das bibliotecas municipais, e un diploma.
- Terceiro premio: Vale por un valor de 50€ a trocar en calquera das 14 librarías da cidade colaboradoras coa Programación LGTBQI das bibliotecas municipais, e un diploma.

6. COMO SERÁ A SELECCIÓN?

6.1. O xurado estará formado por unha diversidade de persoas, organizadas en dúas roldas: nunha primeira fase, serán os colectivos e entidades LGTBQI colaboradores na organización do programa de actividades LGTBQI 2017 do Concello de A Coruña, xunto co técnico coordinador do Espazo das Diversidades Sexuais e Identidade de Xénero, e baixo a presidencia da concelleira de Igualdade e Diversidade ou persoa en quen delegue, os que seleccionarán as fotografías máis axeitadas á temática do concurso: a expresión da diversidade afectiva sexual en todas as súas formas e a representación da vivencia do orgullo na nosa cidade.

A Secretaría do xurado será exercida por unha funcionaria da Concellería de Igualdade.

A partir desta selección, e nunha segunda fase, un grupo formado por persoas profesionais ou expertas do ámbito da fotografía, a prensa ou a comunicación seleccionarán as imaxes gañadoras atendendo a criterios de creatividade, a orixinalidade da proposta e a súa calidade fotográfica.

Os membros do xurado serán designados pola concelleira de Igualdade e Diversidade.

6.2. Corresponde á presidenta dirixir e ordenar as deliberacións e votacións. A funcionaria que exerza as funcións de Secretaría velará polo cumprimento destas Bases.

As deliberacións do xurado serán secretas e a súa decisión inapelable.

6.3. Unha vez asinada por todos os seus membros a acta do xurado co fallo, informarase ás persoas gañadoras mediante un comentario na fotografía seleccionada ou a través dunha mensaxe directa. Nesta comunicación se solicitarán os seus datos persoais para proceder a publicación dos nomes das persoas gañadoras na páxina web e nas redes sociais da Concellería de Igualdade e Diversidade.

No caso de persoas participantes menores de idade, para proceder á publicación dos datos persoais será necesario aportar o ANEXO I destas bases, debidamente asinado pola nai, pai, ou persoa que exerza a garda legal da persoa menor de idade, nas oficinas do Espazo das Diversidades Sexuais e Identidade de Xénero (Centro Cívico Cidade Vella).

6.4. Se transcorrido un prazo de tempo axeitado tras esta primeira comunicación coas persoas gañadoras, non se recibe resposta pola súa parte, o premio correspondente será asignado á seguinte persoa finalista, constando no expediente os intentos realizados.

7. DIFUSIÓN DAS FOTOGRAFÍAS PARTICIPANTES

7.1 Ao publicar as súas fotografías en Instagram xunto co hashtag **#viveoteuorgullo**, as persoas participantes aceptan que a Concellería de Igualdade e Diversidade poida difundilas como parte das súas ferramentas de comunicación, páxina web e redes sociais.

7.2 As persoas participantes serán convidadas a asinar unha licenza “Creative Commons”, que permitirá ao Concello da Coruña e a outras usuarias poder empregar as súas fotografías. Por suposto, as persoas participantes manterán o dereito de empregar as súas imaxes para calquera outro propósito que desexen, e o Concello da Coruña e outras partes tamén terán dereito de uso. Para máis información sobre este tipo de licenza, visita [Creative Commons](#)

8. AUTORÍA E PROPIEDAD INTELECTUAL.

As persoas participantes ao presentar os traballos a esta convocatoria garanten que son as lexítimas autoras dos mesmos, e que ostentan os dereitos de propiedade intelectual requiridos para a súa presentación con todos os elementos que os compoñen, e que a súa presentación non vulnera dereitos de terceiros. As persoas participantes, garanten e son responsables de ter obtido os permisos necesarios de calquera persoa que apareza en ditas imaxes, de acordo coa lexislación de aplicación en cada caso.

Así mesmo, fanse responsables das reclamacións que puideran formularse en calquera momento sobre a autoría e orixinalidade dos traballos e sobre titularidade de dereitos e cuestións anexas, todo elo de acordo coa normativa de propiedade intelectual. O Concello da Coruña non se fai responsable dos prexuízos que puidera ocasionar o incumprimento desta garantía, e poderá exercitar as accións legais oportunas coa fin de reparar os danos e prexuízos ocasionados.

9. PROTECCIÓN DE DATOS DE CARÁCTER PERSOAL

Os datos persoais solicitados en conformidade coas bases do concurso serán unicamente empregados para a localización e a comunicación coas persoas premiadas, non cedendo ou

comunicando o Concello estes datos a terceiros. En calquera caso, os datos das persoas premiadas serán publicados na web da Concellería de Igualdade e nas redes sociais da Concellería, sen prexuízo da súa comunicación en medios de comunicación locais.

10.- PUBLICIDADE

As presentes bases unha vez aprobadas, así como a acta do Xurado cos nomes das persoas e traballos gañadores serán publicadas na web da Concellería de Igualdade e Diversidade, sen prexuízo da súa difusión a través das redes sociais e medios de comunicación locais.

ANEXO I

AUTORIZACIÓN MENORES DE IDADE

(A CUBRIR POLA NAI, PAI, OU PERSOA QUE EXERZA A GARDA LEGAL DE MENORES DE 18 AÑOS)

D./D^a _____, co DNI/pasaporte en vigor número _____, na miña condición de nai/pai/titora/titor, pola presente AUTORIZO á _____ a participar no **I CONCURSO DE FOTOGRAFÍA “VIVE O TEU ORGULLO” 2017** organizado pola Concellería de Igualdade e Diversidade do Concello da Coruña.

En _____ a _____ de _____ de 2017.

Sinatura